

Pri alaus buokala

Vēina žēimuos pavakarē, pērmējē sosiedā Petris ēr Juonis sorokava nueitē ē barieli alaus ēšgertē. Alodie pasijiemē po dēdēji buokala alaus ēr spotkieli žērnium. Atsisiedosio pri stalelē vīrā ved ruoda.

– A gērdiejē, ka šiuoms dēinuoms par spauda ē radējē renk metu žmuonis, – gorkšteliējēs alaus saka Petris.

– Ē diel šiuo šimtmetē žmuogaus ēt diskosējēs, – nobraukēs potas no lūpu ēštarē Juonis.

Vīrā neskobiedami po bēški kaštavuojē „Baltējēs“ alo ēr ožkonda vērtū pasūdītu žērnium.

– No, kāp tau atruoda? – viel prašneka Petris. – A gerē metā bova ēr kas geresnē par tus metus ēvīka Lēnkēmu padongie?

Gerdami putuota Klaipiedas ēšdērbini, aptariniejē, kāp sogriovosēs bendruovēs torta ēšsēdalēna. Džiaugies ka kelininkā aspalta ont kelē lig pat Palonga pakluojē. Dēdelis lēngvoms nujau, ka diel salierkas ēr benzina nebrēk ē Skouda bevažioutē – degalēnē če pat, Lēnkēmus.

– No mon jau baisē nepatēka, ka bēndruovē ēšsēardē, – atsēdosēs so pēktomo ēštarē Juonis. – Ka parejau ēš sosērēnkēma, ēš tuo šērdēis skausma vēns pats pēlna skleinīčē šnapšēs sokratiau.

– Mon atruoda, ka bus geriau. Kou nuori, tuo dērbi, nieks tavēs nekamandavuo, – neprētarē Petris.

– Va, tamē ē reikals, ka dabar rēk dērbtē. Va, bēndruovie šēik tēik pakošiejē par dēina, so draugās kartuoms kiksa solopā. O valdītuous brūkšt kelis litus ē ožraša. Je valdītuojou če, –paruodē Juonis so pērsto ē pakaklē, – tad vēsā gerā.

– Nok a gerā, tad gerā bova. O kou to siūlā i metu žmuogaus kandidatus, sosiedieli? – klaus Petris.

– Aš abēdvē ronkas kelo ož seniūnē Danutē, – brazdindams šaukštieli i stala, tarē Juonis.

– Noj, noj, tuoki darbšti, maluoni, nerizikauni muotrēškelē, kētuos tuokiuos rēk paēiškuotē, – pritarē sosieds.

– Metu žmuogaus varda īr verts ēr puons Edmunds Untulis ēš Skouda. A veiziejē, kāp ons anou vakara par televizējē grūmies so krokodilās diel mūsa pruosenieliu – žemaitiu kalbuos ēr tarmies apsauguojēma? – sosējaudēnēs kalbiejē Juonis.

– Regiejau, regiejau. Bet daug ēr pritarē anuo mintims.

– No vo kou rokouji apie šiuo šimtmetē žmuogo? – kousnuodams žērnium klaus Juonis.

Petris, biški pamēslējēs, saka:

– Mona pruotou bovēs prezidents Ontuons Smetuona. Ons sava laikē Lietova vedē teisingo, prabaguotiejēma kelio.

– Je ne Stalins è Kitlierios, šëndèin gīventomem geriau ož švedus. Èr lopatū èš anū
nevežtom. Èš mūsa gautom geresniu, – ožbèngè politikoutè Juonis.

Vīrā ožsièmuokiejè èr padiekavuojè ož alo, èškolniava è nomus pas sava princesès.